

HENR. AVG. WRISBERGH

PHIL. ET MED. DOCT.

ANATOMES ET ART. OBSTETR. IN VNIVERSITATE GOETTING.

PROFESS. PVBL. ORD. SOC. REG. SCIENT. SODAL.

OBSERVATIONVM ANATOMICARVM

DE

# NERVIS VISCERVM ABDOMINALIVM

PARTICVLA PRIMA

QVAE DE


GANGLIO PLEXVQVE SEMILVNARI  
AGIT.



GOETTINGAE,

Aqud IOANN. CHRISTIAN. DIETERICH.

M D C C L X X X .



VIRO ILLVSTRI  
ATQVE  
EXCELLENTISSIMO  
**DOMINICO COTVNNI**

PROFESSORI NEAPOLITANO  
INCISORI MAGNO ET MEDICO SAPIENTI EGREGIIS  
INVENTIS NON PER ITALIAM SOLAM SED PER  
TOTAM EVROPAM

LONGE CELEBERRIMO  
**F A V T O R I E T A M I C O**

PLVRIMVM COLENDO

HAS OBSERVATIONES ANATOMICAS TANQVAM VENERATIONIS  
PVBLICAE DOCVMENTVM

FOVET ET CONSECRAT  
**HENRIC. AVGUST. WRISBERG**  
ANATOMICVS GOETTINGENSIS

Digitized by the Internet Archive  
in 2016


<https://archive.org/details/b22288703>

---

*Diss.*

## P R A E F A T I O.

**Q**uas ante aliquot annos pollicitus sum, de *Nervis viscerum infimi ventris anatomicas observationes*, horis succisivis conscriptas, eas partitim in lucem edere constitui. En itaque *primam* huius operis *particulam*, quae primarium horum nervorum fontem, *Ganglion nempe plexumque semilunarem*, et nervos illum formantes complectitur. Sequentur annuo spatio una alteraque particula, et ultima tandem, *icones quasdam* huc spectantes comprehendens, tractationi finem faciet. Uttere his **BENEVOLE LECTOR**, donec majora mea anatomica opera, in quibus exarandis et expositiendis nunc totus occupatus sum, in lucem prodierint.  
Dab. Gottingae d. 24. Mart. 1780.





## §. I.

In nevrologia humani corporis, utilissima cognitu, et quoad praeparationem difficillima anatomes parte, ad hunc usque diem non omnia exhausta esse, fere omnes cordati testantur anatomici, idque tanto magis dolendum est, quo major, quoque clarior nevrologiae influxus in omnes physiologicas aequa quam pathologicas functiones ubique invenitur. Summam quidem deprehendimus diversitatem, qua tam ratione numeri, quam respectu quantitatis, et modi distributionis natura partibus animati corporis nervos impertivit. Ab organis enim sensoriis ita dictis, seu potius ab instrumentis, externarum rerum impressiones nobiscum communicantibus incipiendo, quibus creator prae reliquis longe omnino maximam filamentorum sentientium copiam dedit, per musculos, et viscera fibris muscularibus praedita, progrediendo ad alia viscera, soli vel secretioni liquoris cuiusdam destinata, vel alii functioni praefixa, ad vasa, ad canales, ad membranas, ad integumenta interna, nam de cute hic non loquimur, ad tendines, aponeuroses, ad telam cellulofam et sic porro, semper

ner-

nervorum numerus insigniter diminuitur, donec tandem in variis partibus eorum plenarius defectus extra omnem dubitationem positus est.

## §. 2.

Medico, de corporis humani diverso sensibilitatis gradu judicanti, primo loco diversus adeo nervorum per omnes nobiliores partes distributorum numerus cognitus esse debet et proportio, si ex affectibus internis externisque, de vehementia et gradu, cum gratae tum ingratae perceptionis judicium latus est. Sequitur quidem dein nervorum conditio ipsa, tam ratione distributionis, expansionisque modi, quam respectu integumentorum nervis incumbentium crassitiae atque texturae, sub cuius diverso habitu, doloris perceptio ab irruente peregrina caussa, alia esse potest in parte quadam pluribus quidem nervis instructa, sed profundius sitis, quam in alia paucioribus praedita, sed facilitioribus tactu. Ocurrat tandem tertia, in augenda minuendave corporis sensatione, circumstantia, quae a commercio pendet, mediantibus nervis, inter dissita maxime corporis loca intercedente. Omnem sane fidem superant, quae stupenda et inaudita plane phaenomena in toto corpore hic nervorum consensus jam exhibuit. In facie quidem, si ex laesa fronte oculus periculose saepe afficitur; ut visus debilitate, aut subita abolitione laboret; vel vice versa, si observatores fidem merentur, visus in amaurosi abolitione subito sanata sit, postquam casu fortuito nervi frontalis laesio contigit: aut ex dentis affectu universum caput dolet, vel ex genarum, labiorum oris, palpebrarumque vulnere aures patiuntur, aut ex aurium laesione faciei musculi in plerisque locis convelluntur. Ex linguae adustione, aut aphtis illam copiose insidentibus, oculum, buccas, vocis respirationisque organa incredibilem in modum affecta vidi. Pulmonibus ulcere, scirrhisque affectis asperam arteriam, laryngem, linguam, faucesque pati, res notissima est; ventriculum vero

vero ex eadem causa munere suo rite fungi non potuisse, mihi per certas nonnullas constat observationes. Ictus vehemens, regioni epigastricae infictus, subito aphoniam produxit, frequenti balneorum usu, post 5. hebdomades demum sanabilem. Mel, quo in enemate in delicatula quadam hysterica persona usus fueram, me quidem inscio ne nomen quidem mellis, multoque minus rem ipsam ferente, convulsivos motus excitavit, cum aliquam intestinorum crassorum partem tantum clyisma penetrasset. Ex nephriticis doloribus nuper horrendae et incredibilis fere scena, testis fui, doloribus, vagitu, anxietatibus, priapismo, quin ipsa involuntaria spermatis excretione fese manifestantis, citoque dispartentis, cum calculus ex uretere in vesicam delatus esset. Summum hypochondriacum in hominibus teneris affectum, ex infarctu in flexu iliaco, uberrimis nervis praedito, haerente, cui nimio enematum usu succurrere vulgo solent, saepe observavi. Vehementissimam sensus motusque per notabile tempus cessationem, cum subita asphyxia, pallore, artuum perfrigerio, et mortis instantis metu conjunctam vidi in hortulano, cui fodienda terrae dedito, et ad anteriora flexo, petulans manus ictum scroto intulerat, quo fulmine citius in terram concidebat. Inde repetenda sunt, uti egregie Illustris CAMPERVERS a) dixit, terribilia symptomata hysterica, ab acrimonia putrida primas vias occupante: extremitatum inferiorum convulsiones in infantibus quorum rectum intestinum ascaridibus plenum est: hinc epilepsiae aliique spasmi, ex draconicorum purgantium vehementi effectu: eam ob causam gibbosis interdum urina supprimitur, mox sine voluntate prorumpit, alvusque illis invitatis exoneratur, quod haec partes ex male affecta medulla spinali suis nervis laborent: inde in retentione urinae voluntaria nimium protracta, borborygmi et colici dolores, qui urina reddita protinus cessant. Finem autem non inveni-

a) *Demonstrat. anat. pathol. Lib. II. Amstelod. 1762. p. 8. §. 7.*

venirem, si plura afferrem exempla, passim in clinicis frequentia, et cuilibet tironi notissima, nisi cane et angue instar librorum studium et lectionem negligat spernatque.

### §. 3.

In universum quidem nervorum systema, tam in locis, ex quibus nervi proveniunt, ut encephalo et medulla spinali, quam in toto itinere quod absolvunt; nexus quendam et communicationem servant; oculorum enim nervorum paria, cum inter se, tum mediante quinto pare cum primo, septimoque, multiplici ratione conjuncta sunt: Dura portio septimi, seu communicans faciei, per ramum suum inferiorem seu descendenter cum octavo, nono, cervicalibus superioribus, et intercostali; octavum, mediante intercostali, cum omnibus fere spinalibus, phrenico, et nonnullis cranii coniunctum: praeципuum autem totius systematis nervosi perficit nexus intercostalis, qui primos fere cranii nervos, cum ultimis in sacro osse exeuntibus necit, caput itaque, truncum, artusque in unum conjungit.

### §. 4.

Quamvis celebri illi nervorum anastomosi, ubi rami ex diversis locis orti, vasorum instar in unum filum confluenter, quae nonnullis adeo placet, anatomicis rationibus permotus, vix assentiri possim; cum in plerisque nervis ramorum divisio, percossa intermedia cellulosa, ad ortum nervi continuari queat, uti in divaricatione ischiadici magni nervi in peroneum et tibiale, in crurali, mediano, cubitali, aliisque facilis observatio est: illa tamen nervorum loca, ubi frequenter ganglia filamentis intermixta sunt, a regula exceptionem faciunt, et luculenter declarant, unionem et miscelam quasi ibidem diversarum nervis impressionum fieri, quare nullibi etiam consensus nervorum plura extant testimonia, quam in communicante facieci seu duro,

duro, pari quinto, nervo sympathico maximo, et praecipue in systemate viscerum abdominalium.

### §. 5.

Visceribus vero abdominalibus, quorum late patens ambitus in infimo ventre comprehensus, et a diaphragmate, quod multiplici ratione suum in abdomen influxum exferit, ad profundum pelvis extum, maximam sane cavitatum corporis animalis partium numerum continet, natura non ex unico tantum fonte nervos impertire poterat, sed ex primariis fere locis, ad meliorem perficiendum consensum in abdomen nervos ablegavit. Sunt enim *phrenicus*, *ostavus*, et fere *omnes spinales*, si aliquot paria cervicis, superiorumque dorsi excipere velis, et si surculos ad intercostalem magnum missos simul consideres, ne hi quidem excipiendi sunt, qui ad formandos nervorum abdominalium inextricabiles fere plexus symbolam suam conferunt. Medulla enim spinalis, licet ipsa immediate, quantum quidem ego scio, nulli abdominalium viscerum surculum mittit, sed omnia illa nervorum filamenta mediante *nervo sympathico maximo*, quem injuste *intercostalem* plerique vocant, visceribus impertuntur, quodque iterum, experimentis confirmatis triplici modo fieri afferere possum. Ex media infimaque colli parte, ut et ex superiore thorace ad quintam sextamque costam usque, uti deinceps occasione itineris sympathici describemus, tenuis quidam truncus in nonnullis cadaveribus formatur, quem, nisi aliis nomen displiceat, *nervum splanchnicum superiorem et minorem* appello, hic omnino, si in quibusdam adest, primum ganglii plexusque semilunaris exortum sistit. Altera nervorum abdominalium genitrix est *Nervus splanchnicus inferior* et *magnus*, in omnibus praesens, quem non adeo commode *Collateralem* nonnulli, alias *intercostalem anteriorem* appellant: five simplex hic fuerit, five quod saepe contingit, alium minorem et infimum splanchnicum proxime subsequentem simul in ganglion sumat, vel illum ad renalem

plexum mittit, semper origo plexus semilunaris maximam partem ex illo repetenda est: tertio tandem loco plures insignes fasciculi ex nervo sympathico per lumbos et os sacrum decurrente, plexui renali, mesenterico inferiori, hypogastrico, spermatico, vesicali, sive seorsim, quod consueta in multis ratio est, vel nonnullis eorum in majorem fasciculum coalitis admiscentur.

### §. 6.

Facile quidem in mentem venire posset, nervorum tantae dignitatis, quorum usus tam multiplex, et connexionis ratio ineffabilis fere est, cognitionem perfectam nostris temporibus concinnare velle, quam antiquissimis scriptoribus et observatoribus in tanta descriptiōnum et iconum farragine jam dudum exhaustam esse créderes, vel ignorantiam in iis, quae jam scripta prostant, redarguere, vel philautiam proprii laboris redolere. Ipsa vero scriptorum anatomicorum qui nullam picturam dederunt attenta perlectio, non excepto WINSLOWIO, b) BERGEN, bb) WALTHERO Lipsiensi, c) GVNZIO, d) PEAGETO, e) HALLERO, f) LUDWIGIO, g) Ill. ISENFLAMM, h) MONRO, i) et iconum de his nervis abdominalibus extantium cum natura comparatio, EVSTACHII, k) WILLISII, l) VIEVSSE-

NII,

b) *Expos. Anat. T. III. p. 329. edit. Paris. 1732.*

bb) *Diff. de Nervo intercost. in Halier. Coll. II. p. 871.*

c) *Progr. I. et II. de Paris interc. et vagi anat. ib. p. 909.*

d) *in Hipp. libr. de humorib. purg. Lips. 1745.*

e) *de Actione Musc. interc. et dia-phragm. Paris. 1740.*

f) *Elem. Phys. Tom. IV. §. 45. et de Part. c. h. fabrica et funct. P. VIII. §. 45. p. 419.*

g) *Progr. de plexibus nervor. abdom. Lips. 1772. et in ej. Anweisung zur Erfentnis der Th. quam edidit Weichardt. Warsov. 1778. p. 431.*

h) *Versuch über die Nerven. Erlangen 1774.*

i) *Anatomy of bones and nerves. Edimb. 1750.*

k) *Explicat. Tabular. ab ALBINO. Lugd. b. 1745. Tab. 18. 19.*

l) *Cerebri Anat. Genevae 1680. p. 166. Tab. 9.*

nii, m) pictoris PETRI BERRETTINI, n) Illustrisque SCHMIEDELI, o) DAGOTY, p) et aliquantisper CHESELDENII, q) me convicerunt, multa in hac doctrina supereesse vel addenda, vel melius ornanda. Ut pauca tantum nominem, quae non satis accurate proposita sunt, refero huc inter alia phrenici nervi cum abdominalibus conjunctionem, filamentorum ex sympathico praeter cognitum splanchnicum ad plexum semilunarem transmissionem, ipsiusque per pectus abdomenque decursum et in pelvi finiendi rationem, octavi paris ab ortu per collum thoracemque descensum, et veram ejusdem cum plexu semilunari confluxum: ganglii et plexus semilunaris situm, magnitudinem, figuram, fabricam, ramos minores subministratos in novos plexus formatos, nervorum ipsorum per hepar, renes et intestina iter atque decursum, plexus hypogastrici veram originem, et per viscera pelvis distributionem. His in anatome subtiliore et difficiliore lacunis resarciendis, ultra 13. annos occupatus fui; ne putetis, me temerario ausu ex unica observatione integra volumina conscribillare, ut saeculi nostri saepe genius est, micam galenamque publico, loco auri vendere velle. Quae propositurus sum, ex plus quam sexaginta cadaveribus humanis conquisita sunt, illoque studio, ardore, verique amore, et ea, tum in proprias meas, tum in aliorum observationes diffidentia, quam nostrum in fraudes proclive saeculum poscit, conscripta collectaque sunt; ut certo asserere possim, ne unicam quidem occurrere descriptionis nostrae nervorum abdominis particulam, quae non quater vel quinques visa, et cum aliis comparata sit. Falsa itaque plane non irrepsisse, cum summa animi hilaritate et fronte affero serena, metu vero afficio dum perpendo, me

B 3

omnia

m) *Neurograph. universal.* Lugd. 1685. p. 188. Tab. 23.

n) *Tabulae anatom.* edit. a CAJET. PETRIOLI Romae 1741. Tab. 5. 6. 7. 8. 9.

o) *Diss. in qua quaedam de nervo*

*intercost. notantur. Erlang.* 1754.

p) *Exposition anat. des organes des sens.* Paris 1775. Tab. VI. VII.

q) *Anatomy of the human body.* Lond. 1712. Tab. 29.

omnia forsan non annotasse, quae dives natura observatoribus ostendit. Tractationis meae de nervis viscerum abdominalium eam partem, quam nunc publice exhibeo in IV Sectiones divisi, quarum *1<sup>ma</sup> nervum phrenicum* continet, *2<sup>da</sup> par octavum*, *3<sup>tia</sup> nervi sympathici maximi* decursum per thoracem, usque ad ganglia semilunaria, *4<sup>ta</sup> ortum*, fabricam, situm, figuram, magnitudinem, varietatesque in *gangliis plexuque semilunaribus* occurrentes ostendet.

---

## SECTIO I. DE NERVO DIAPHRAGMATICO SEV PHRENICO.

---

### §. 7.

**N**unc tandem cum veritate afferere possum, quid de controversa illa nervi phrenici ex nono pare cerebri origine tam saepe defensa, et denuo ab aliis impugnata sentiendum sit. Certissime non in omnibus cadaveribus origo hujus nervi ultra quartum aut tertium cervicalis ascendit, est tamen varietas, quam in 37. cadaveribus, in quibus ad hanc originem attenus fui, nunc quinques vidi, in proportione itaque uti 6 vel 7 fere ad 1. nervus phrenicus cum nono pare nervorum cranii per ramum descendenter connexus est, qualem ortus nexusque rationem cum suis varietatibus viderim, describam, nam naturalem fabricam, ceu omnibus cognitam, omitto.

### §. 8.

Nervi Phrenici per *duos ramos ex cervicalibus et uno ab intercostali ortum*, in tribus subjectis sequentem in modum vidi.

Tres

Tres erant binis exemplis in latere sinistro, unico in dextro; nec plures origines s. radices, diversae magnitudinis. Ex quarto et quinto pare nervorum cervicalium et ex *intercostalis* ganglio cervicali medio.

Maxima crassissimaque radix ex quarto, ex ipsius nervi, specum vertebrarum egressi, et extra musculos comparentis, trunco prodibat, longior autem et fortior secunda radice, recto itinere descendebat, arteriam subclaviam sui lateris inter et venam, et infra venam ad acutissimum angulum cum altera radice jungebatur.

Secunda radix ex quinto pare s. primo brachiali prodiens, pariter ex ipso trunco venit, summa in vicinia nervi subscapularis: oblique in thoracem abiit, venam subclaviam supergreditur, ita tamen ut ipsius vena tunicas perforet, medius inter illas haeret, et firmiter cum illa concreta esset, non mobilis est, sed attracto nervo tota vena simul movebatur, cum venam aperirem, notabile tuberculum in interiore vena superficie in illo loco conspiciebatur, quo nervus per tunicas transibat. Immediate intra venam confluebat cum praecedenti radice, conjunctionis locum attingebat art. mammaria interna, per radices phrenici in thoracem descendens.

Tertia exiliissima portio ex ganglio cervicali medio accedebat, brevis, et tenuissima, inferebatur in primam radicem paullo super arteriam subclaviam, et nunc integer nervus phrenicus iter suum prosequebatur.

### §. 9.

Quinquies nunc, prouti in introitu dixi, simili fere semper modo surculum insignem ex ramo descendente noni paris, phrenico in thorace admisceri vidi, et hac ipsa hyeme in cadavere adulti satis manifeste. Facile vero sub praeparatione, uti b. HALLERVS r) jam

mo-

r) de Part. fabrica et funct. P. V. p. 148.

monuit, laeditur, quare clavicula in situ et nexu relinquenda est, si ramum illum ex nono cum phrenico communicantem invenire, et lustrare volumus. Conveniunt vero omnes § observationes sine notabili varietate, nisi quod origo phrenici nervi mox 3. mox 4. mox 5. filamentis adscribenda sit, et surculus, qui ex nono eidem accessit, mox unico in specimine ex ipso trunco noni paris indiviso, mox ex ramo ab octavo ad nonum abeunte, quod in uno cadavere contigit, vel, quod in 3 exemplis animadvertis, ex ramo descendente solo, aut cum quodam cervicali in arcum coniuncto, provenerit: Multis varietatibus hic ramus descendens ludit, quem, cum in adversariis meis non nisi unica vice deficiente animadverterim, et ego aequa, quam ANDERSCH, et NEVBAVERVS inter constantiores paris noni ramos tuto retuli. Insignis hic ramus, ubi ex pari nono, arcuatim linguae sese appropinquanti prodit, directe ad latus internum venae jugularis internae descendit, et dum vena facialis a jugulari secedit, aliquot surculos in ossis hyoidis laryngisque musculos misit, dein recto itinere usque ad venam thyreoideam superiorem descendit, et eleganter circa ramum hujus venae arcuatus versus posteriora reflectitur, et magno surculo, ex cervicalium secundo et tertio pari venienti, occurrit, ex quo accidente nervo, paullo ante ejusdem cum hoc ramo descendente confluxum, non parvum filamentum ad phrenicum, ex quarto cervicalium nervorum ortum, abierat: hanc in uno cadavere rationem observavi. Ex convexa hujus ansae parte tres rami versus inferiora descendebant, bini ad musculos laryngis et ossis hyoidis, unicus omnium longissimus sed tenuissimus quoque claviculae extremitati exteriori proximus, super vasa sub clavicula decurrentia incedit, et ad angulum acutum cum reliqua nervi phrenici ex cervicalibus et brachialibus orta portione confluit, ita quidem, ut duobus in cadaveribus vasa mammaria per illam conjunctionem transierint.

## §. 10.

In sinistro aequo quam in dextro latere, per exiguum intervalum, quod intercipiunt arteria subclavia, vena axillaris, ubi ex communi trunco venae subclaviae procedunt utraque jugularis interna inquam et externa, descendit nervus phrenicus ex collo in thoracem, et pone latus sinistrum arteriae mammariae internae sinistri lateris incedendo ad pericardium inclinat elegans surculus venosus ex vena subclavia sinistra ortus, in quem varii minores ramuli ex thymo confluunt, in toto per pericardium itinere usque ad diaphragma illum comitatur. Laxissima cellulosa nervum pericardio annectit, in tanta tamen observationum copia, ne minimum quidem filamentum videre potui, quod ex phrenico nervo in pericardium mitteretur. Sterno paullo propinquior quam in dextro latere, versus diaphragma cum vena eundem comitante properat, et in tres ramos anteriores, medium, et posteriores divisus, carnem diaphragmatis eo in loco attingit, ubi arteria phrenica per septum transversum incedit. Omnes postquam ex trunco divisi ad suam diaphragmatis partem pervenere, inter fasciculos diaphragmatis musculares se se abscondunt, et diaphragma quasi perforando in inferiore seu abdominali septi superficie denuo in conspectum prodeunt, et per eandem distribuuntur, quasi haec superficies nervis magis egeret quam superficies ejusdem superior vel thoracica. Nunc speciatim quilibet ramus sequenti ratione per septi carnes dividitur.

*Anterior*, quem ex sua directione omnino anteriores appellare possumus, reliquis aliquanto minor, statim ad eas diaphragmatis partes excurrit, quae sterno ejusdemque processui ensiformi costisque adhaerent, et pauxillum interiora versus inclinat, cum simili ramo anteriore dextri lateris quasi coire vellet, hic nulli alii, praeter carnes diaphragmatis parti surculos nerveos impertit. *Medius* autem tendineae parti diaphragmati commissus, phrenicae arteriae occurrit,

C

et

et ex pluribus furculis in inferiore septi superficie distributis, tres distincte cum filamentis plexus phrenici ex abdominalibus confluunt.

In dextro latere nerv. phrenicus duobus ramis diaphragma petit, quorum alter anterior in musculari septi parte decurrens, et in plures furculos divisus in inferiore diaphragmatis superficie finitur, fine ullo visibili cum nervis abdominalibus intercedente commer-  
cio; hic erat *major*. [*Minor* tendineam regionem legens, pariter ad inferiorem seu abdominalem superficiem descendens inter cen-  
trum tendineum et peritonaei productionem in varios ramos dehiscit, aliqui eorum parvi tendinibus septi intermiscentur, plurimi vero ar-  
teriam phrenicam attingentes cum § neryulis ex abdominis plexu  
coeliaco simul cum arteria phrenica inferiore ascendentibus inter-  
miscentur.

## SECTIO II.

DE

### PARI OCTAVO QVOD VAGVM VVLGO APPELLATVR.

§. II.

**O**ctavum par, eo sensu quo a plerisque, qui ultra hunc vel illum autorem non sapiunt, accipitur, in tres diversos nervos dividen-  
dum, et Accessorium, nec non *Glosso - pharyngaeum* ab octavo proprie-  
*dito* separandum esse, ad mentem meam dilucide exposuit Solertiss.  
SOEMMERRING s) discipulus olim noster, nunc Cassellis Anat. Pro-  
fessor

s) *Lib. de basi encephali et origini- Goett, 1778. p. 9. et 159. seq.  
bus nervorum cranio egredientium.*

fessor Celeb. In toto illo ab ortu per collum descensu pauca habeo, quae observatis aliorum Clariss. virorum notissimis addere debarem, ANDERSHII praecipue, saltim ad meum scopum nunc non pertinentia. Varios autem surculos ex eodem cum filamentis ab intercostali provenientibus coalescere, et in mediastino posteriore descendere, oesophago prospicere, et nervo splanchnico nostro superiori admisceri, non adeo frequenter annotatum lego: Arrisit vero prae aliis in hoc nervo octavo occurrentibus varietatibus secundi recurrentis mentionem facere, quem ter in homine observavi, cuius uberior descriptio alio calamo in lucem produisset, nisi infelix fatum ex meis discipulis Eruditiss. THOMANNVM vindobonensem, anatomicum subtilem et solerter, ante aliquot menses praematura morte eripuisset.

### §. 12.

Cum enim, uti notissimum est, nervi recurrentis origo in quolibet latere ab eodem loco, in dextro nempe latere, ubi circa subclaviam flectitur, altiore, in sinistro, ubi aortam descendantem ambit, profundiore, repetenda sit, monendum est, me nunquam in sinistro latere talem recurrentem minorem vidisse, et de dextro latere solo observationes intelligendas esse.

Dato vero nervo recurrente dextri lateris, qui circa subclaviam dextram ad collum reflectitur, octavum par aliquot lineas progreditur, dum simul in eo itinere aliquot surculos ad plexum cardiacum mittit: Nunc vero novum emitit ramum, non mediocris crassitie ad superiora retrocedentem, quem ideo *recurrentem minorem appello*: hic surculus perfecte ad modum majoris recurrentis inter asperam arteriam et oesophagum ad superiora progreditur, in minores fibrillas divisus, quarum maxima paullo post in recurrentem majorem confluit, et insulam hoc modo format. Forsan hic recurrens minor in

sinistro latere superfluous est, quod e profundiore loco ortus major, munera minoris suppleat.

### §. 13.

Decursus nervi vagi usque ad finem commode secundum latera describi poterit. Ergo primum de dextro. Dum integer nervi octavi truncus in dextro latere ad ultimam colli regionem descendit, in pectoris cavum ingressurus, in angulo latet, quem carotis dextra cum subclavia sua congenere format, et ex parte anteriore a vena jugulari communi et subclavia ejusdem lateris tectus est.

In hoc triangulari intervallo, nervi truncus distincto fulco et hiatu in duas quasi portiones finditur, *recurrentem* nempe, et *continuationem trunci*. Hac ratione super arteria subclavia dextra incedendo thoracem intrat, et minor portio, interiora respiciens sub arteria subclavia reflexa versus superiora nunc nervum *recurrentem* constituit, *major portio*, seu trunci continuatio, exteriora tenens, recto fere itinere in thoracem descendit. Statim post secessum recurrentis emitit vix dimidium pollicen progressus, notabiles surculos *pro recurrente minore*: truncus vero ipse pressius ad bronchum accedit, et antequam retro venam azygam, in cavam superiorem abeuntem incedat, et sub eadem abscondatur, plures emittit minores surculos 4. 5. quin 6. in aliis cadaveribus. Omnes hi nervorum surculi versus interiora migrant, et inter corpora superiorum vertebrarum thoracis a quibus truncus octavi paris non multum distat, et inter asperam arteriam oesophagumque absconduntur, partim per asperam arteriam distributi sunt, partim per fibras musculares oesophagi finiuntur.

His surculis emissis truncus nervi inter bronchum dextrum et venae azygae truncum ad venam cavam inflexum ad pulmonem dextrum properat, et hoc in loco maximam patitur mutationem, pluresque

que in ramos divisionem, ex qua quidem divisione tam pulmonales nervorum plexus, quam oesophagei oriuntur.

Paullo supra venam azygam nervi truncus manifeste aliquantis per latecit, quod latitudinis augmentum sub azyga crescit:

Datis dein numerosissimis ductu canalis bronchiorum per pulmonem divisis ramis qui plexum pulmonale dextrum proprie formant, et proprio ganglio in multis instructi sunt, subito totus nervus super oesophagum in latum plexum oesophageum resolvitur: ex hoc plexu infinita filamenta oesophagum ipsum adeunt, dum vero directionem hic plexus mutet a dextris versus posteriora, sensim separati illi majores fasciculi confluunt denuo in unum grandem nervum ad posteriorem marginem oesophagi in abdomen delabentem, non infrequens vero ex meis observationibus est, duos, duos maiores et tertium minorem surculum transiisse, et vel totos vel quoad maximam partem, postquam antea ad latus posterius cardiae latum plexum gastricum posteriorem formaverint, s. 6. usque ad 13. filamentis cum totidem ex semilunari plexu provenientibus, in amicabilem unionem cum splanchnicis abiisse.

### §. 14.

Decursus nervi octavi in sinistro latere, tantum in quibusdam momentis differt ab illo dextri lateris. Allegatis pluribus in sinistro latere ad plexum cardiacum augendum surculis, qui circa carotidem sinistram multas parallelas strias albantes, facile a flava arteriae tunica descernendas formant, semper ad latus sinistrum carotidis, inter eam et jugularem communem, versus thoracem descendit, arctius tamen semper cum carotide conjunctus manet, sub vena subclavia sinistra thoracem nunc intrat, et fere simili ut in dextro latere ratione in duas portiones divisus, in angulo, carotidem sinistram inter

et subclaviam arteriam descendit, in quo intervallo autem plures parvos nervulos super carotidem spargit, reliquis superius memoratis implicitos. Nunc sub vena intercostali prima, quae non in communem venae azygae truncum sanguinem suum mittit, sed peculiaris hemiazygae parvae instar in venam subclaviam sinistram immergitur, sub hac inquam vena intercostali lectus, super arteriam aortam descendenter incedit, et *nervum recurrentem* sinistri lateris versus superiora reflexum dimittit: inter has duas portiones eleganti spectaculo exigua arteria et venula ex intercostalibus decurrit, et nervum ipsum suis ramulis amplectitur.

Altera, ab ortu recurrentis remanens major portio; seu truncus denuo in duos ramos divaricatur, *minorem* anteriorem bronchi sinistri partem petentem, in plures minores surculos divisum, qui per venas pulmonares et bronchum distribuuntur: *majoremque ipsum* in posteriore bronchiorum parte multipici ratione divisum, ut insignis grandisque plexus pulmonaris sinister et posterior inde ortus sit, copiosissimis surculis per pulmonem divisus. Reliquum quod pulmones non acceperunt, tam arcte ad exteriorem pleurae superficiem in aliquot ramos divisum incedit, ut difficile dictu sit, plane nihil nerveorum surculorum pleurae impendi: propius tandem ad oesophagum accedunt nervi octavi continuationes, plexum *oesophageum* sinistri lateris, qui nunc sensim anterior fit, formantes, et cum aliis surculis superioribus, ex plexu pulmonari oesophago exhibitis communicantes. Tres primarii nunc plexus oesophagei anterioris fasciculi in unum truncum coaliti, ad anteriorem oesophagi partem descendunt, et in transitu per diaphragma etiam in hoc cadavere manifeste aliquot surculos septo remittunt transverso. Dum versus cardiam appropinquit, in latiorem quandam fasciam expanditur, et iter suum ad oram curvaturae ventriculi minoris dirigit, et in plures ramos dehiscit, tum *plexum gastriacum anteriem* formantes in plano ventriculi anteriore, tum alios surculos in planum posterius mittit, cum octavo dextri lateris

ris communicantes, tum alios ad pylorum usque ductos. Quantum ego quidem distinguere potui, nullam memorabilem communicacionem, quae cum ramo alicujus magnitudinis perficeretur vidi, inter octavum sinistri lateris nunc descriptum cum splanchnico, praeter illam, quam uterque vagus inter se ostendit.

§. 15.

Ita res sese plerumque habet in naturali statu, ubi quilibet nervus vagus separatim ventriculum attingit. Rarior cum sit varietas, ut trunci ipsi confluenter, descriptionem hujus aberrationis addam, ut pateat, paullo post naturam in eundem redire tramitem, quem semel deseruit, et priorem constantiam servare.

Postquam uterque nervus octavus, relictis pulmonibus, editisque nervis huic visceri, vel plexibus bronchialibus, se super oesophagum conjectit, et plexus oesophagaeos confuetos effecit: in distantia pollicis cum dimidio a loco, ubi gula per diaphragma in abdomen demergitur, in *unum truncum* confluent dexter sinisterque nervus octavi paris s. vagus. Crassitatem insignem pennae coruinae nunc obtinet, aliquot parvis filamentis insimae oesophagi parti datis, in posteriore margine, cum oesophago ad  $\frac{2}{3}$  pollicis indivisus in abdomen descendit, et supra diaphragma rursus in duos trunços dehiscit; *posteriorem*, qui sinistro lateris vago respondet, et *anteriorem*, ad dextrum pertinentem. In hac directionis mutatione sola varietas a naturali statu mansit. *Posterior truncus*, sub illo ramo, quem arteria phrenica sinistra in cardiam mittit, latescere incipit. In transitu hoc per hiatum diaphragmatis manifeste ex posteriori trunco paris vagi tria filamenta in crus septi transversi sinistrum abire vidi. Nervi nunc posterioris integer truncus in posteriore cardiae plano in multos ramos, quorum nonnulli insignem latitudinem habent, dispergitur, et spatium ultra pollicem latum sub hac divisione occupat. Praecipui illo-

illorum ramorum sunt sequentes: Tres rami aequalis magnitudinis cum duobus minoribus, aliquo facto arcu versus cardiam et vicinam plani posterioris ventriculi partem recurvantur: Duo magni latique fasciculi, mox in plures minores surculos divisi, cum interspersis aliquot minoribus filamentis super omnem ambitum plani posterioris ventriculi dispergebantur, hi ergo cum praecedentibus formabant *nervos gastricos posteriores*: reliqui omnes, quorum 5 ramos majores, latiusculos, et aliquot minores numeravi, ductu arteriae coronariae sinistrae, versus coeliacam migrabant, et forti plexu eandem ambientes, cum plexu splanchnico pluribus in locis conjungebantur.

*Anterior truncus*, seu dextri vagi continuatio, in anteriore cardiae superficie vel plano, eadem ratione uti posterior in notabilem expandebatur latitudinem, multiplices ramos spargentem, et simul finitum. Primi ex ordine sequentes rami, in hoc cadavere 5 fasciculos majores minoresve componentes, recurvati versus dextrum latus, et membranae firmae intexti, in qua rete quoddam formabant, versus lobum hepatis sinistrum mittebantur, et partim cum arteria hepatica sinistra, partim per fulcum portarum sinistrum; hujus visceris partem minorem petebant: hi itaque rami formabant *plexum hepaticum sinistrum*, s. *minorem*, uti illum appellare soleo. Omentum parvum, s. *Gastrohepaticum*, quod illius membranae continuatio est, aliquot parvos surculos nanciscebatur, et plexui majori admiscebatur. Omnes reliqui rami per totum planum anterius ventriculi dispergebantur, curvaturam minorem sequebantur ad pylorum usque, omento parvo et hepatis dextra lobo surculos exhibebant, unoque verbo *plexum gastricum arteriorem* perficiebant.

## SECTIO